



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Zelenskyy-i Russia military anema
Tomahawks dang amshitsü nangzük

Luton Town nung head coach
Jack Wilshere kümogo

VOL. XXIII ISSUE NO. 07 (ADOK 07) DIMAPUR SANGTENNÜ TUESDAY) MONGPUTENI (OCTOBER) 14, 2025 ₹ 5.00

KohimaDC-i Jotsoma By-Pass road semdang

Dimapur, October 13, 2025 (TYO): Kohima Deputy Commissioner B. Henok Buchem, NCS-i October 13, 2025 nü Jotsoma By-Pass Road semdangogo.

Tawa Liezocha aser Kezanu nung anentsüh aluba ajanga NH-29 tesem kar nung garitem mesenzüteter aser iba jagi Jotsoma By-Pass Road ya kanga tongti lenmang ka kümogo.

"JVC, JYO, NSDMA, Traffic Police, PWD (R&B) aser sendaka alirtemi amalitepa yaritepba atema pelar. Asenoki lendong kodang ataloktsü meteta mali anungji repair work rongdak süa inyaksüla" ta DC Buchem-i ashi.

Bangdak department-i iba mapa indangidanga inyaksü aser iba ya mapa tajung inyaksü atema lir. PWD (R&B) teloki lenmang tajung ka yanglutsü tamang akar ta pai ashi.

Iba repair work atema senotsü ya Disaster Management Authority ajanga agütsür aser tekaratiba nung renemtsüla. Kohima nung ali kanga tanük lir aser anogoshia truck gari 400 shi senzür ta Kohima DC-isa

ashi.

Iba lenmang yanglushiba ya tekaratiba nung inyaksüla. Tzüngluruwa mapang raksaba lenmang yanglushitsü atema senotsü agütsü aser iba nung land compensation dena mali ta paisa metetdaksü.

Traffic police-i gari tulutem senzüdaksüba ya jungjunga mita anütsü nüngdaker ta Additional SP (Traffic) Kohima Khatso-i ashi.

Iba lenmang ya ajak atema lir anungji department-i lenmang tajung ka yanglutsü ayongzüker ta JVC Chairman Rüdolie Nagi-ia ashi.

JYO-i tesem kar nung anentsüh aluba yadokogo aser lenmang yanglushiba nung yariteptsü mulunga dang lir. Sorkari tarutsü nung iba by-pass road ulushitsü bilemstsüla aser traffic advisories anema senzükba gari tulutem merenshitsüla ta President-i ashi.

JVC aser JYO teloktemi PWD (R&B) department dang contractors nem masü saka indangidanga mapa inyaksü maneni mepishi.

NSF-i enumeration exercise pusema nungiter

Dimapur, October 13, 2025 (TYO): Nagaland sorkari enumeration exercise inyakba pusema nungiter kechiyong iba ajanga sensotem temeten kümzüka ayutsü aser özüng alema arurtem noktangsü ta Naga Students' Federation (NSF)-i metetdaksüogo.

Iba enumeration exercise ajanga Nagaland nung December 1, 1963 matongdang arua alirtem jangiatüsü aser iba ajanga Nagaland nung benefits aser privileges angutsü.

Ajisüaka iba maparen nung shilem magirtem lir aser kin pezüi shilem agitsü memulungba atema tebilemstsü abenba NSF-isa metetdaksü.

"Iba mapa ya telemsa adoktsü mesüra mesenmetua amshitsü atema masü saka kanga nüngdakba mera ka lir" ta NSF-i ashi.

Nagaland-i özüng alema nisungtem aruba ajanga

tayongzüka tulu ajurur. Non-Naga nungeri özüng alema state telungi aiter aser parnoki official state-recognised certificates nguogo ta NSF-i ashi.

Nagaland nung Inner Line Regulation akangkanga inyaksüla aser arrtsü junga anütsüla ta parnokisa ashi.

Inner Line Regulation Commission ajanga enumeration maparen inyaker aser nisung karibo commission ya committee ka dang ta ilaja jembir. Ajisüaka, ILRC ya NSF nung tematiba lemtet agiba ketdangpurtemi tentet aser parnok ya NSF nung federating units ajaki pusema nungiter ta NSF-isa metetdaksü.

NSF-i maneni Naga temetentem kümzüka ayutsü aser kasa mapang Nagaland nung akhidang nungi liyonga aruba kintem akhümtsüba liyonga aotsü ta parnokisa ashi.

Imkong Imchen-i Soil & Water Conservation dept tebilemstsü lemsateper

Kohima, October 13, 2025 (TYO): Nagaland nung Soil & Water Conservation Department nung senotsü peria mangur, administrative lemtet shitak magir aser department tashimait küma aoer ta MLA Imkong L. Imchen-i ashi.

Directorate of Soil & Water Conservation nung Command and Control Center tenzüka sentong nung Imkong Imchen-i "department nung tetemjen ketdangsür aika lir saka senotsü peria melemzüksüba ajanga parnok mapa mali kazüteper" ta ashi.

"2023-24 financial year nung annual fund allocation ji Rs 2.50 crore liasü, 2024-25 nung Rs

2.70 crore aser 2025-26 atema Rs 3.50 crore lir. Iba ya department tila ka annual allocation dena tajemba lir" ta Imchen-isa ashi. Pa ya Soil & Water Conservation department aser Information & Public Relations department atema Advisor lir.

Nagaland tesem balala nung department nung ketdangsür 100 jungnüa mapa mali kazüteper. Tesüiba küm asem tashi senotsü peria melemzüksükba ajanga parnok mapa mali ta paisa ashi.

Department of Personnel and Administrative Reforms (P&AR)-i Soil Conservation Assistants (SCA) atema pre-

service training system melena in-service model tenzüc asern iba ya tamagitsü policy ka lir ta Imchen-isa ashi.

Taoba pre-service system ya Zubza Institute nung agi aser India nung subject-specific training institute ji iba ya dang lir. Iba institute ajanga skilled aser employable candidates adok ta pai ashi.

"P&AR department-i system raksatsü aser training agirtem mapa mangu dang nungi itasen agitsüsa policy ka benok. Iba ya kangasa tamashi lir" ta Advisor Imchen-isa metetdaksü.

Zubza Soil Conservation Training Institute nung batches 21 nungi candidates 439 nem

training agüja liasü. Ajisüaka revised service rules ajanga require government-funded in-service training nüngdaker aser iba ya senotsü khuret ka aser mebilemdangi inyakba mapa ka lir ta paisa nenshi.

Rules of Executive Business ajanga Rashtriya Krishi Vikas Yojana (RKVY) kübok Natural Resource Management (NRM) component ya Soil & Water Conservation Department nem agütsü saka tang Agriculture Department ajanga ketdang asür. Sorkari Rules of Executive Business sülen anidaksü tim ta Imchen-isa ashi.

Nagaland nung Land Resources Department aser

Water Resources Department balala lir. Ajisüaka Soil & Water Conservation Department-i indangidanga soil & water wadang inyaker saka Agriculture Department kübok ang inyaksangshir ta paisa shisem.

"Inyaksangshi nungbo özü department ya Agriculture kübok seal tila ka lir aser full-fledged department ta ashitsü makok" ta Advisor Imchen-isa metetdaksü.

2015 nungi tenzüker Union Ministry of Jal Shakti kübok "Rejuvenation of Mines and Spoiled Areas" scheme ta ser Rs 35 crore alang DPR ka dang agizüka lir. Onok ket nung iba ya dang lir ta paisa ashi.

Nagaland sorkar mapa inyaker temi tanü nungi pen-down strike tenzüker



Ketdangsertemi osangbenertem den jempiba noksa nung angur.

Kohima, October 13, 2025 (TYO): Nagaland nung sorkar mapa inyaker telok pungu longjemer tentetba Joint Coordination Committee (JCC)-i Mongulbar nungi tenzüka anogo asemnü pen down strike alitsü osang metetdaksüogo.

Kohima nung Confederation of All Nagaland State Services Employees Association (CANSSEA), Nagaland In-Service Doctors Association (NIDA), Nagaland Secretariat Service Association (NSSA), Nagaland Finance and Accounts Service Association (NF&ASA), aser Federation of Nagaland State Engineering Service Association (FONSESA) nungi teshimtet nübotemi osangbener senden ka amendang iba osang metetdaksü.

2016-17 nung State Civil Service officers-i sorkar dang IAS cadre nung non-NCS officers manioktsü shidi ka züluba sülen iba ken o tenzüka liasü ta CANSSEA President Zubemo Lotha Tsanglao-i ashi.

"March 2025 nung sorkari vacancy circular ka sangdong aser anogo 15 tsünga applications agütsütsü ashi. Idangji nisung 11-i tenüng agütsü saka anogo 16 buba nung sorkari circular meyipa agi aser iba ajanga tejashitep adok" ta pai ashi.

Iba lemtet anema black badge aser poster campaigns dena sorkar mapa inyaker temi aiben lungkak aita liasü saka sorkari associations den olemtep metenzük ta Tsanglao-isa ashi.

"October 14 nungi 16 tashi onoki özüngi melaba ama lungkak aittsü. Districts aser headquarters ajak nung sorkar

mapa inyaker temi office-i aotsü saka pens mamshitsü. Onoki asen lanurtem tarutsü kümzüka ayutsü atema meritocracy kümzüka ayutsü" ta paisa metetdaksü.

"Onoki lungkak aitba ya Naga nunger ajak atema lir" ta FONSESA President, Fineson Pojar-i ashi.

"Sorkari meritocracy ajungkettsü aser backdoor appointments azüoktsü atema Nagaland Staff Selection Board (NSSB) tenzüko saka parnoki IAS nung non-NCS officers anioker" ta pai ashi.

Iba inyakyim ajanga NPSC examinations ajanga mapa anguba ketdangsürtem mezügmeshir aser lanurtem dang osang tai prokshir ta Pojar-isa ashi.

"Onok associations ajak onük ka atema külemi longjemogo. Tangatetba shitak aliba senso shiai temeten atema inyakba mapa pusema nungittsü mepishir" ta NIDA President Dr. Thomas Keppen-ia ashi.

"Onoki lungkak aitba ya nisung kar anema masü. Onoki meritocracy tangatetba kümzüka ayurba dang lir" ta NSSA General Secretary Benito K. Swu-ia ashi. "Sorkari merit-based IAS induction sülen manidak tashi onoki lungkak aittsü" ta NF&ASA President Amenla Jamir-i ashi.

"State nung NPSC, NSSB, aser IAS induction atema temzüng balala malitsüla. Onoki Nagaland tarutsü pututem atema noktaker" ta laisa ashi.

"Sorkari Department of Personnel & Training regulations tim mestü amshir aser backdoor ajanga IAS nung anioker" ta

CANSSEA Core Committee member Imtiwabang Jamir-ia ashi.

JCC indang takhangba tongti anaji- UPSC dangi yokba panel list nungi non-NPSC candidate tenüng agientsü aser tanabubaji tarutsü IAS induction processes nung NPSC clause meyipa bener arutsüba lir, ta paisa metetdaksü.

Applicants list aser parnok performance grading (APARs) metettsü atema September 26 nü P&AR Department dangi RTI ka zülüogo. Iba list nung non-NPSC candidate ka dena lir ta onoki meteta lir ta Jamir-isa ashi.

Sorkari tang tashi nung olemtep mesüra tongtepratep kecha mali. Sorkari ola madokra onoki shilem lemsar lungkak aittsü ta CANSSEA President Tsanglao-isa ashi.

State sorkari March 10, 2025 nü vacancy circular meyipa agi aser iba ya non-NPSC officer ka IAS induction atema liasü ta tai tongloksür.

Employee associations-i sorkar dang 2001 aser 2016 nung agütsüba Office Memorandums sülen anidaksü takhangba agütsür. Item OM nung NPSC mesüra open advertisement ajanga mapa nung anioker dang anikettsü shia liasü.

"Sorkari backdoor nungi nisungtem shimoka Indian Administrative Service tenüng memenentsütsüla. Sorkari o aser mapa agi meritocracy tangatetbatem nung ajemdaksüla" ta Advisor to CANSSEA, Dr. Illang-i ashi.

Sorkari anogo asemnü tsünga mapa kecha meinyakra onoki maneni lungkak aittsü ta JCC-i tekümdangtsü olen ka metetdaksü.

District Hospital Longleng nung cataract surgery eye camp agi



District Hospital Longleng nung October 6-11, 2025 anogotem angati cataract surgery eye camp ka ayongzüka agidang tangokba noksa nung angur.

Dimapur, Mongputeni/Oct. 13 (TYO): District Hospital Longleng nung October 6-11, 2025 anogotem angati cataract surgery eye camp ka takok ngua agiogo. Iba camp ya National Programme for Control of Blindness & Visual Impairment (NPCB&VI), Directorate of Health & Family Welfare, Nagaland ajanga Longleng Town Baptist Church den lungjemer par 75th Jubilee benjongmung nungtem nung ayongzüka liasü.

Iba camp tenzüka Rev. Beau, pastor, Longleng Town Baptist

Church (LTBC) ajanga sarasadem, koba Dr. E. Phyantsuthung, State Programme Officer (NPCB&VI), Directorate of Health & Family Welfare, Kohima ketdangsüba kübok agia liasü.

Dr. Ramdeu Lungalang (Jr. Eye Specialist, DH Mon), Dr. Thejavitui Kire (Jr. Eye Specialist, DH Longleng) aser IMDH Mokokchung nungi staff tem, CMO aser District Hospital Longleng nungi iba sentong nung shilem agia liasü.

Camp mapang nisung 241 dak tema tenük repranga liasü

aser 45 indang cataract surgeries takok ngua agia liasü aser nungdakba pur nem presbyopia glasses 20 lema agütsü.

Longleng district aser anasa alirtem nem angati tenük anepaluba service agütsütsü aser tenük tapok akumba paidoktettsüba indang awareness agütsütsü nükjidong nung iba sentong ya ayongzüka liasü.

Dr. E Phyantsuthung, SPO ajanga Longleng Town Baptist Church dang pelaba lemsatapa liasü.

Dimapur nung Settlement of Unclaimed Deposits indang campaign agi

Dimapur, Mongputeni/Oct. 13 (TYO): Dimapur nung "your Money, Your Right" omen kübok District-level Awareness-cum-Campaign on Settlement of Unclaimed Deposits sentong ka Deputy Commissioner, Dimapur indang Conference Hall nung October 13, 2025 nü agia liasü.

'Unclaimed financial assets' tajungba aser tekeraba nung bentettsü asoshi Department of Financial Services, Ministry of Finance, Government of India-i linük tesem ajunga nung tenzüka nung shilem ka ama iba sentong ya Reserve Bank of India (RBI) aser State Bank of India (SBI) lungjemer ayongzüka liasü.

Iba senden ya EAC Dimapur, Imtjijungla Lemtur menden sür agia liasü, shibai deposits aser investments mashishi aliba chichiba kibur nem meyiptsütsü asoshi iba campaign ya ayongzüker ta ashi.

Lai shilem agir ajunga dang pei aliba tesem nung iba indang awareness agütsütsü ajungshia liasü. District Lead Manager, Rongsenyangla ajanga iba sentong nung jembidang, 'unclaimed deposits' indang tebilemtsü tali akumba rateta ashi aser nüburtem nem financial awareness agütsütsü tongtipang lir ta ashi.

Nisung aikati mamshiba aser amadoker aliba accounts, shisatsü mesüra documentation maliba ajanga matured fixed deposits, insurance proceeds memeshi mesüra dividends

mashishi aliba indang memetet ta lai rasaa ashi.

Tang campaign ya tongshi asem - Awareness, Accessibility aser Action (3 A's) telungzüik nung yanglua lir, koba ajanga unclaimed funds tem tsüngsü pua meyipa meshiba maparen tongmelangba kumdaktsütsü, ta lai ashi.

India nung August 31, 2025 tashinung 'unclaimed assets' ya sen 1.82 lakh crore tashi indang lir, anungji nüburtemi pei indang unclaimed assets tem jangjatetba nung shilem tajung agitsüla, ta Rongsenyangla-i metetdaktsü.

RBI ajanga online portal <https://Udhampur.rbi.org.in> tenzüka lir, kong nüburtemi unclaimed deposits jenjang metettsü, t alai ashi aser village councils, GBs aser nüburtem dang iba indang osang prokshitsü ayongzüka liasü.

Iba campaign ya Pradhan Mantri Jan Dhan Yojana (PMJDY), National Strategy for Financial Education (NSFE), National Centre for Financial Education (NCFE), aser Financial Literacy Centres (FLCs) amala schemes ajanga 'financial inclusion' aser literacy tashi itshitsü asoshi Government of India-i meranga inyakba nung shilem ka lir.

Iba sentong nung Village Councils, Dimapur Urban Colony Chairman Federation, GBs Union, aser GBs Association Dimapur nungi dena liasü.

State tesem balala nung SNID Polio Day amung



Phek



Noklak

Dimapur, Mongputeni/Oct. 13 (TYO): Linük tesem balala nung Sub-National Immunization Day (SNID), Polio Day amungba den lirumedema Noklak jila telungzüik aser temeket nunga October 12, 2025 nü tanur nem polio tashidak asoshi mozü agütsütsü nungdakba indang awareness agüja liasü.

Chief Medical Officer, Noklak ajanga Noklak district kübok tesem balala nung Polio immunization booth amenoka liasü aser district nung mezüngbuba oral polio vaccine ya SDO Civil Noklak, Vikhoto Richa ajanga Chief Medical Officer Noklak, Dr. Victor NC aser ketdangsürtem lia agüja liasü.

Vaccine agütsüba aser nüburtem nem awareness agütsüba nung health workers aser volunteers temi shilem agia liasü.

District nung arishi küm 0-5 tsünga tanur 3025 nem vaccine agütsütsü nükjidong lira ser iba atema medical department-i immunization booth 54 amenoka lir aser October 13 & 14 anogotem ki shia oa parnoki awareness agüja mozü agütsütsü.

Phek district kübok District Hospital Phek nung October 12, 2025 nü Sub National Immunization IPPI (Polio Sunday) agi aser October 14, 2025 tashi agitsü sentong lir.

ADC Phek, Thejakhrrienuo Nisa, NCS ajanga mezüngbuba

polio immunization drop ya Dr. K. Chitala Hiese, CMO Phek aser Dr. Khriekuolie Liezietsü, DPO, Phek nungertem lia agütsü.

Phek jila nung Universal Immunization Program, IPPI (Polio Sunday) ya Polio booth 11 nung agia liasü.

Linük ajunga den külemi Kiphire nunga Sub-National Immunization Day (SNID) Polio Day nungtem nung October 12, 2025 nü District Hospital Kiphire, Local Ground, Traffic point main Town, South Zone Church aser Longthonger Junction nung tanur arishi küm pongu tekübok nem agüja liasü. Iba sentong ya Dr. Yelo T. Mero, DPO (RCH/UIP) lenisüba nung agia liasü.

Mon nung Registration of Births & Deaths atema senden amen

Dimapur, Mongputeni/Oct. 13 (TYO): Registration of Births & Deaths atema District Level Coordination Committee (DLCC) meeting ka October 13, 2025 nü Additional Deputy Commissioner, Mon indang Office Chamber nung mena liasü.

Iba senden nung ADC, Mon, Pakon Phom menden liasü aser pai senden nung adenertem pela agizük.

District Economics &

Statistics Officer Mon, Yhunchilo Khing-i Registration of Births & Deaths inyakyim rateta ashi aser Civil Registration System (CRS) nung temulung agütsütsü ashi.

Iba senden nung züngsem temi Births & Deaths records/certificates junga ayutsü, Online Registration of Births & Deaths nung temulung agütsütsü, Periodic Training Programme for Births & Deaths Registrars,

Registrars shimba dak sendakba, Births & Deaths indang records tesüsaba, MCCD aser Delayed Registration of Births & Death onüktem jembia liasü.

Züngsem temi yimtsüng sasep nung Registration of Births & Deaths junga amshitsü aser nüburtem nem arogo aser CSOs ajanga iba indang angatetdaktsütsü indang jembia liasü.

Sakra World Hospital-i AACI accreditation nguogo



Dimapur, Mongputeni/Oct. 13 (TYO): India nung mezüngbuba 100% FDI-funded tertiary care hospital, Sakra World Hospital ya Karnataka nung American Accreditation Commission International (AACI) nungi accreditation anguba mozüki kumogo.

International Society for Quality in Health Care External Evaluation Association (IEEA) ajanga accredited asüba ajanga AACI yagi iba mozüki ya alima nung tajungtiba rongnung ka ta sayur.

ACCI kübok accredit asüba mozüki tem ya lenla ajunga nung kanga junga asadanger.

"ACCI accreditation ngutetba ya alimai metetba kisüng masü, Sakra indang

jenjang tashi itshiba alema oa, iba accreditation yagi Karnataka aser India nung healthcare agütsüba jenjang tajungba kumdaktsür, shiranger anepaluba nung standards tasen ya yutsür," ta Yuichi Nagano, Managing Director, Sakra World Hospital ajanga ashi.

Iba ya ajanga India ya alima nung world-class healthcare aser medical tourism tesem ka akumba tenüng ulushitsür aser shiranger, insurers aser global partners dak tamang katetba tali kumdaktsür. Internationally accredited practices den lirumedema Sakra ajanga healthcare ecosystem temaba jenjangi ajungketer, ta Nagano-i ashi.



October 13, 2025 nü Shimla nung taoba mapang Himachal Pradesh nung Chief Minister, Virbhadra Singh indang kürakyanglu sayaba sentong nung Himachal Pradesh Chief Minister Sukhvinder Singh Sukhu, Congress MP Sonia Gandhi, Congress MP Priyanka Gandhi Vadra aser tangartem adenba noksa nung angur.

Gaza summit nung adentsü atema Ato kilonser, Modi jaok

New Delhi, Mongputeni/ October 13 (Agencies): Gaza peace summit nung shilem agia adentsü atema US Tir, Donald Trump aser Egypt Tir, Abdel Fattah El-Sisi nati Ato kilonser Narendra Modi densema linük 20 nungi lenirtem jaok. Ajisüaka Modi melen Minister of State (Ministry of External Affairs), Kirti V Singh ang iba senden nungji adener. Hombarnü Egypt kübok Sharm El-Sheikh yimti nung Trump aser Sisi na leniba nung

Gaza peace summit tenzükogo. MEA osang ajanga ashiba agi, ajungbena jaokba ajanga Ato kilonser Modi aser External Affairs Minister, S Jaishankar naprongla Egypt-i aotsüji tamakoktsü liasü, ibayongji India tenüng nung shilem agitsü atema Singh yok. Mongolbarnü Ato kilonser Modi-i Mongolia Tir, Khurelsukh Ukhnaa ajurutsü sentong lir aser Hombarnüa Jaishankar-i Canada Foreign Minister Anita Anand ajurutsü liasü, ibayongji tena ka mesüra

ka Egypt-i aotsüji tamakoktsü liasü. Gaza peace summit nung adentsü atema Trump aser El-Sisi nati France, Germany, Turkey, UK, Italy, Pakistan, Spain, Jordan, Saudi Arabia, Qatar aser European Union nungi lenirtema jaoka liasü. Iba senden nungji Israel aser Hamas natibo shilem magitsü. Hombarnü US Tir Trump Israel-i ao aser Israeli Parliament 'Knesset' nung jembiba sülen Gaza summit nung adentsü atema Sharm El Sheikh-i ao.

Soseta asür kati RSS nem tai tongloktsüba bushisüngdang tenzükogo

New Delhi, October 13 (Agencies): Kerala kübok Kottayam nungi arrshi küm 26 software engineer tebur kati Instagram post ka ajanga Rashtriya Swayamsevak Sangh (RSS) züngsemtem nem tai tonglokja soseta asüba sülen Kerala nung yimtenren party tem aser lanur organizations aikati iba tatalokba bushisüngdangtsü takhangba agütsür. Tebursangji October 9 nü Kerala yimtiba, Thiruvananthapuram kübok Thampanoor nung aliba lodge ka nung soseta sür lia angu. Ghonda ishika lir sülen pa indang Instagram profile nung pai züluba shidi ka angu. Pai shidi ajanga, küm aika tejaklen pa dak obsessive-compulsive disorder (OCD) puteta liasü aser ibaji pa RSS nung aliba mapang pai tejashi ajangshiba den sendaktepa lir, ta metetdaksü. Paisa, taoba mapang par kiyonger RSS züngsem kati pa arrshi küm 3 asüandang nungi pa


dak azüaponga tim mesüi benshiba metetdaksü. Paisa pa RSS indang Initial Training Camp (ITC) aser Officers' Training Camp (OTC) nung aliba mapang RSS züngsem aikati pa dak tim mesüi tashiyim amshiba aser pa dak azükba metetdaksü. Pai shidi nungji yamai zülua lir, "Ni shinga danga mejashir saka nisung ka aser organisation ka dang jashir, aser ibaji RSS lir. Ni tanur asüandang kübui ni iba telok nung dendakja liasü, aser ibaji ajanga ni akümüli piyong timtemer. Ni züluba ajak ya parnoki kü dak benshibatem lir." Paisa, "Parnok indang camps nung shi azü-apong mapatem inyaker aser azüker. Shingaia ni ashibaji mamangtsü, kechiyong kü ket nung kuli mali. Ajisüaka ni kü taküm tenla agütsüba ya kuli lir," ta metetdaksü. Paisa, RSS shakhas aser camp nung adener tanurtem kümzüksü atema inyaksüla aser counselling junga agütsütsüla, ta metetdaksü.

Iba tatalokba anema Code of Criminal Procedure (unnatural death) nung Arrla 174 kübok police-i FIR ka benokogo. Osangbenertem den jembidang Thampanoor station house officer-i, "Onoki Instagram post ji nguogo. Soseta asüba ken o ya onoki tang bushisüngdangdar," ta metetdaksü. Par kinüngertemi, "Police-i onok dang Instagram post nung shia aliba tatalokbatemji parnoki bushisüngdangtsü ta shiogo, anungji onoki temeja ken o mebenok," ta metetdaksü. Parnokisa, "Ozü kibongi mapang talangka nungi RSS pusemer aser pa lanuwa RSS camps nung denogo," ta metetdaksü. Pa tebu-a RSS züngsem ka liasü aser pa küm trok tejaklen süadokogo. CPI(M), Congress, Youth Congress aser Democratic Youth Federation of India (DYFI)-i iba tatalokba ya jungjunga bushisüngdangtsüla, ta takhangba agütsüogo.

Bihar nung AIMIM-i menden 32 nung tokteptsü

New Delhi, October 13 (Agencies): Taruba Bihar assembly election nung Asaduddin Owaisi-i aniba All India Majlis-e-Ittehadul Muslimeen (AIMIM)-i menden 32 nung tokteptsü ta metetdaksüogo; ibaji ajanga Opposition Mahagathbandhan teloktep jenjang raksatsütsüa akok ta bilemer. Kishanganj nung osangbenertem den jembidang AIMIM Bihar unit Tir, Akhtarul Imam-i, "Onoki Mahagathbandhan teloktep nung adentsü asüngdang, ajisüaka magizükba agi onoki kija sasep nung tokteptsüsa aküm," ta metetdaksü. Paisa party-i tokteptsü aliba constituencies metetdaksü saka candidate tem tenüngbo memetetdaksü. "AIMIM Bihar-i secular votes lemsaba nokdangtsü aser telemsa adokdaksüba teloktem anema longjemtsü merangogo, ajisüaka teloktep partner tulubai memelung. Ibaji ajanga Third front ka tentetsüsa aküm," ta Imam-i metetdaksü.

AIMIM-i tokteptsü tebilemba aliba assembly menden 32 ji district 16 nung lir aser item constituency nung Bihar nung nütüsing shilem 16 bo Muslim nungertem lir. Assembly constituency 243 nungi 40 nungbo Muslim nung nütüsing teimba lir. 2020 küm Bihar election nung AIMIM-i BSP aser RLSP den longjemer toktep aser parnoki menden pongu nung takok ngua liasü. Constituency aika nung Muslim nung votes lemsaba ajanga RJD aser Congress teloktepi tamakok ngua liasü. Election tembangba sülen AIMIM MLA pongu nungjagi pezüi RJD nung adenba ajanga assembly nung AIMIM nungi MLA ji Imam kija aküm. "Tangbo secular votes lemsaba atema RJD-i onok nem tai metongloktsütetsü. Ni shidi ajanga Lalu aser Tejashwi na dang longjemtsü asüngdangogo, saka telangzüba kecha mangu," ta Imam-i metetdaksü.



October 13, 2025 nü New Delhi nung External Affairs Minister S. Jaishankar aser Canada Minister of Foreign Affairs, Anita Anand na senden amenba sülen tangokba noksa nung angur.

भारतीय प्रतिभूति और विनियम बोर्ड
Securities and Exchange Board of India

भारतीय प्रतिभूति और विनियम बोर्ड
सेबी भवन II, प्लॉट सं. सी-7,
"जी" ब्लॉक, बांद्रा कुर्ली कॉम्प्लेक्स, बांद्रा (पूर्व)
मुंबई (महाराष्ट्र) - 400 051, दूरभाष: 26449000 / 40459000

Tender No. : SEBI/HO/ITD/CSC/2025/10/01

Securities & Exchange Board of India (SEBI)-i "SEBI project atema Next Generation Security Operations Centre, Network Operations Centre (NGSOC-NOC) aser tanga security solutions" atema open tender ajanga Request for Proposal (RFP) meshir. Refer RFP No.: SEBI/HO/ITD/CSC/2025/10/01 telatetbatem aser anogo/mapangtemji (www.sebi.gov.in) nung "Tenders" section kübok angutsü.

Yimlibilema nü proposals ji iba link ajanga agüjang :
<https://www.mstcecommerce.com/eprocn>
CBC 15204/11/0174/2526



October 13, 2025 nü Ranchi nung police aser Sujit Sinha telok nungi züngsemtem khatepba sülen police-i iba tesem nung bushisüngdangba noksa nung angur.

ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110029
EXAMINATION SECTION

ADMISSION NOTICE NO. 321/2025

F.No.AIIMS/Exam.Sec./Advt./4-5/INI-CET-PG-January-26/2025 30.09.2025

January 2026 session PG Courses agitsü admission atema INI-CET

AIIMS, New Delhi aser tanga AIIMS, JIPMER Puducherry, NIMHANS Bengaluru, PGIMER Chandigarh aser SCTIMST Trivandrum nung PG Courses [MD/MS/M.Ch. (6years)/DM(6years)/MDS] atema Institute of National Importance Combined Entrance Test (INI-CET) January 2026 Session atema admission agitsü asoshi AIIMS, New Delhi-i online ajanga applications meshir, aser anogo-mapang telatetbatemji yamai alitsü: -

Online Registration for application	Start date	Closing Date
Online Registration for application	30.09.2025	21.10.2025 (by 5:00 pm)
Status of Registration and last date of correction of rejected Images / Incorrect registration details	24.10.2025	26.10.2025 (by 5:00 pm)
Uploading of admit card on AIIMS website	01 st November, 2025 (Saturday)	
Date of Examination	09th November, 2025 (Sunday)	

Osang metetplaa alitsü aser osang tejangja metettsü atema mapang shia website
[www https://aiimsexams.ac.in](https://aiimsexams.ac.in) reprangang.
CBC 17112/112/0039/2526 ASSTT. CONTROLLER (EXAMS)



TIR YIMYIM YIMOBILEM (EDITRIAL)

DIMAPUR TUESDAY, OCTOBER (MONGPUTENI) 14, 2025

Bendanger nütsüing renloker

Alima nung nisungtemi teinyaktsü tapu meyi nangka bilemyonga nütsüing nübo melira kecha meinyaktettsü. Ano külen nütsüing nübo aika aliyonga chiyongtsü peria mekara timtem lendongang ataloktsü. Ibayongji, kibong nung tanur aika masotsü asoshi, talisa, alima kin tulutem China aser India nungbo government-i tangatetba agüja “pelaa alitsü asoshibo kibong tilasa tajungba” “ Small family, Happy family” ta yimyim tajung ayima pei tashi aser rongsen den mesütep nütsüing merenloktsüsa azüoka aruogo. Iba jagi metetmeteta China aser India na prongla nung taoba küm 50 tsüingda nütsüing ajemba meteter. Ajisüaka, ano tanübo nütsüing tali ajema adokba tebilemtsü tasen ka agi alima kintem aika nung kongshia lir. Item kintem rongnung talisa Europe nung aliba kintem aser Asia nunga Japan lima ama nungbo tasortem dang nungibo tasürtemang teimba asütsüsa ataloker. Itemji peisasa tanur maginüba mesüra kibong tila dang aginüba mesüra government-i nütsüing ajemtsü sentong yanglua ajungshiba agi masü saka tetsürtem nu menden nung tanur metanglokba agi tanur masor, anungji nütsüing marener. Ano, nütsüing züinba aser ajema akümba ya tamangba yimsü daka tuluka keta lir, kechiyong tamangba yimsü aikati tebur kati kinungtsü ka dak tali ayutsü memelar, saka Muslim ama tamangba yimsüibo tebur kati, pai danga kokra, khen nung kinungtsü asütsü asoshi tetsür pezü tashi agitsü aser ayutsü melar. Iba ama tamangba yimsü jagi alima nung nütsüing renlokba nung tuluka yarir. Aji oda, Hindu, Sikh mesüra Khristan kibong ka nung tetsür kati tanur ka mesüra ana asor aserbo nokdangadoker. Ano, item tamangba yimsü amangertem kibongtem nung tanur maliba kibonga aika lir. Ajisüaka, Muslim nunger kibongtem nungbo kibong ka nung kinungtsü pezüi tanur anana dang aso nunga tanur tir kümadoker, iba amaji Muslim nunger alidak nütsüingji khen nung aika kümer alir. Atangji, India nung tang tashi Hindu nunger nütsüingji 80% shi lir, anungji Muslim nunger nütsüing teimba aser tekara renlokaka, ano India nungbo Hindu nungersa teimba lir. Ajisüaka, Bangladesh anasa aliba Assam state ama nungbo Muslim nunger nütsüing agi Hindu nunger nütsüing menepa atur, anungji küm ishika sülenbo, ashiko, Muslim nunger nütsüingang teimba akümtsüa akok. Iba shisabulu jagi tang Assam government-i Assam nung Muslim nunger aliba tesemtem nung senso jangjashiba mapa tenzüker aser government li atsünga Muslim nunger yimtsüingtem küma alibatambo bentoktsüogo. Aji oda, talisa Assam nung nütsüing kangabo merenloki ajemdaktsütsü asoshi government-i atongba sentong ajungaji Muslim nunger dak rangloker parnok nütsüing ajemdaktsütsü asoshi inyaker. Atangji, Muslim nungertem alidakji teti petsaperong aser lendong lir, saka parnokji majunga ta ashir masü saka alima nug koba tesem aser koba mapa nung südirsüaka nütsüing teimba aliba teloki dang telemtetba agitsü aser yimsü asütsü. Tanü Assam nung taoba küm ishika tsüingda Muslim nunger kija agi nütsüing 40 % tashi asütsüsa akümbaji, atangji, Assam senso Muslim nungertemi asoba nütsüing nübo agi züinba masü saka talisa Bangladesh nungi arur Miya nungertem züindaktsüba lir. Kasaji, Nagaland nunga, talisa, Dimapur aser Niuland district na nung Muslim nunger nütsüing züinba angur. Atangji, parnok ajakji ayangertem dang lir saka parnokji asen lima nung ayanga-ayanga alu nunga parnok kibur aser shishilembadaka parnok kibur kümogo. Aji oda, asen lu parnoki yimtsür, kiojen parnoki yanglutsür, shi angö, entsü, chipo aonpu, ngashi-akong, süoshi second hand nungi shir first hand tashi aser electronics oset ajak Muslim nungertemi ayoker. Aser joko Nagatsür aika Muslim nunger kiyii oa lir aser parnok chirnurtemji Naga nunger kümogo. Ano, asenok asoshi lendong aser shisabolutsü kaji, asenokibo parnokji Naga yimten nüjiso bushiba mapa nung anioka amshir. Item jagi kodang asenok tashimait kümdir asenok mapayutsü. Itemji shisadanga, asenokibo parnokji tashiyim agi meindoktsü makoktsü aser ILP amshiba kija agia majettsü, saka asenoki parnok melena asen lima nung asenok nüngdak mapatemji inyak tenzüksüla. Idangji dang parnokksasa oa adoktsü, kechiyong parnok ayangdak makatsü.

OLEMSABANG

ASANGSANG ASÜ PONGMANG AKA !

~ Mrs.R.Mapukala, Pongen.Rtd. Teacher,
Merangmen Tzürangkong.

Langpangkong nung Nokenketer Mongchen Chuchuyimlang nungi, Asür Limakümzüker aser Imsüsangla na Jabaso, Tenem tebong ama, tetemsü lanur, molutsü ama shisa bener, Wapong Mayang Lima soja-sotettsü ati...

Mapang tetemsü nung metsü ozü-i ken aten ama, Tasodang teyangluri ne sembet balaka yanglutsüogo. Molulisem ama mezüingdangtet nü mapa tajungtem. Ya alima nung shibai-bo nonga ta shitettsü !

Shisanir , meraket Wapong, alima Sanen Yimsen sübong medem, Yimrong nung ne shisatsü nübori nguogo.

Arem sübong tezü shisang-shisanga aliba ama, Tasü tait taküm, ajem-ajema shisakar Salomon ama, Piyong tenem nung anü atoker ama, tanganütsü ola asü. Takok aser tamakok tia nunga tanemi aremzüksang. Nüngja pitinu rongnung züngsemtsüsa Yimsüsür yangsem. Nü shisatsü alima mesama tashi jembijen jembitsü.

Nasa tia takasang, tetemsü teyarir tajung ka, Debuia yimti nungi asür Longer Jala watsü Tiamongla, Shiba tasü tait, shisatsü nung tekümküm, Septsü tentsü mopong agi onshidanga odangjong ama, Lai menürema shisa süngjemshir tasü idaktsü. Iyongji ayongnutsü aika longteper tzüyim aküm ama, Mesüliwa otzüsüitsüsa jembitsü nai inyakteta yutsüogo.

Ayatai !! Ya kichi atalok, asangsang asü pongmang ya, Tsükla mapang anü pranga lia, aoksa-a yipru agi, Mangmanga sübong medem, yamai ataloktsü tabo mepilem. Oh...atura nangpong, anojungi anü alu den sako, Na kongi ao-aka ! meyiba shilangtsüa ta asübo jungla na ! Yashi tashi amang nung Milen sangwa ka ama liasü. Saka tanübo iba tesangwa akümlir nungi bener ogo-ni...

Oh... Saka ya ne dak dang ataloker masü ako ! Mezüingdangtet akümlirtema anojungi Tipu limai ago. Nikongtsütsü anü melunüseti ai medem, nai onok toktsüogo. Sensaker leni-maor, lajartem-ang temulung teraksaba, Na asünübo nü mapa tajung jembira mejembima asüa no ! Anü luaka akümlirtem mapa mayim, asü pila Sentong repranga. Mangyim ola agi alima asünga no !

Oh ! Ali meimchirtem, tetzüri asoba ajak kenübo asütsüsa. Akümlir lima alidang tajunger dangbo junger ta tenüngsanga, Tulus, tilar tebendang makai tushiteba lilasang, Meimchir matsüingdang asenok temeim sentsü melilasüing !!! Saka taküm alidang tajung inyaktsü meteter meinyakra, Süia or külenbo kangasa sasaseterako... Akümlirtem. Tenük merem indoker meimchir ajaki tajung dang inyaktsü koda !

Jogo ojang ati, ya tiatzür Sentong dang. Onoka na alidaki kenübo arutsü, menemjemi oa atangni... Oh... Soja-sor kümli jungsang, ajak den tila küma litet-sang, Ayongnu tzü ayim ama ola asü anepsang. Nü dang tatempang salem ta ashitsübo temulungi maremtetka. Masür maliako...aika ogo, anosa nü sülen senjen sena arutsü-ako..

Tsüa...oagi anüngtsüing kelen kodaker meyi ter sanger alidak, Nabo atongsemogo ni...meyiba majurutetka. Merongjeni oangni ! tasü aküm leman nung na terongjen ni... Meyotsüingbaer süngküm ajangdang na shiba ta asüingdangra, Orü atener Oh...ni saneninla O Aokümla na tebu, Soja-sor wapong Mayang Lima ta shiangma... Kodanga mepilaba lima nung asenok ajurutepti no... (TATEM SALEMA NI..)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima Liangmai Baptist Arogo nung Pastors' Appreciation day among



October 12, 2025 nü Pastors' Appreciation Day anogomong sentong nung KLBC Women Department-i ken ka atendang tangokba noksa nung angur.

Kohima, Mongputeni/ October 13 (TYO): October 12, 2025 nü Kohima Liangmai Baptist Church nung Pastors' Appreciation Day mongogo; Ibri 13:17 omen nung ajemdaker tekülem sentong agi, ta Rutmakbo Media Cell, Kohima Liangmai Baptist Church sangdong ajanga metetdaksü. Iba anogomong sentong nung jembidang Deacon, Er. Achakbo Newmai-i Arogo tanela nung aintsü atema pastor tem aser putirtemi shisatsü tajung agütsüba den tesayuba balala agütsüba indang jembia liasü. Paisa, pastor temi kanga nendaka tenzükba ajanga Arogo len anir, aser ibaji ajanga tamangertem tamang jenjang junga yanglutsür, ta ashi. Paisa Arogo nung züngsemtem dang pastor aser Arogo nung lenirtem akhümtsüba kati ka tenzüktepa Khristan tajung kaka asütsü ayongzük.

US State Dept-i China dang pastor, Jin Mingri chioktsü mepishir



Pastor Jin Mingri

October 13, 2025: Trump administration-i China dang underground Arogo ka nung pastor ka tangsa chiokang, ta takhangba agütsüogo. Pastor Jin Mingri (Ezra Jin taka ajar) ya Hokolbarnü Beihai, Guangxi Province nung par kidang lia China ketdangsertemi apu. Kasa mapang nungjisa yimti balala nung Zion Church nung lenirtem aser züngsemtem 30 dak tali puogo. Pastor Jin Mingri'er chirmurtembo America nunger sensotem lir. US Secretary of State, Marco Rubio-i sangdong ka ajanga China nung Arogo lenirtem apubaji aitsüba den külemi China nung Communist sorkar dang house church züngsemtem tetsübu/tarendak kecha makai sademsadema tekülem sentong agitettsü atema parnok nem temelaba agüjang, ta takhangba agütsü. Rubio-i sangdong ka ajanga, "Arogo lenirtem mita aoba ya ajanga China Communist Party (CCP)-i Khristantem anema inyakba aser unregistered house Arogotem nung tekülem sentong agiba magizüktetba sayur," ta metetdaksü. Arrshi küm 56, Jin ya Zion Church tenzüksang lir. 2007 küm tenzükba Zion Church ya non-denominational Evangelical Arogo ka lir. China nung underground Arogo tulutem rongnung iba Arogo ya densema lir. 1989 küm Tiananmen Square nung democracy pusema takhangba agüja longkak aitba mapang nung pai-a shilem agia liasü. Longkak aitba tembangba sülen pai Khristan yimsü agizük aser California nung aliba Fuller Theological Seminary nungi graduate süa liasü. 2018 küm sorkar ketdangsertemi Beijing nung Zion Church mita aoba sülen iba Arogo shibangja liasü. Iba sülen nungjagi Arogoi online ajanga tekülem sentong agi tenzük aser China tesem balala nung Arogo network tenzüka liasü. Zion Arogo indang online tekülem sentong nungji nisung 10,000 dak temaisa aden. Khristantemi Zoom, YouTube aser WeChat ajanga iba sentong nung dena liasü. Pastor Jin'er jala, Grace Jin Drexel ya US Senate nung staff ka lir aser la Washington area nung alir. Grace-i, "Ketdangsertemi kübu maneni mita repranger aser China toktsür aotsü memelar. Ajisüaka pai maneni iba Arogo anir," ta metetdaksü. Pastor Jin kinüngtsü, Chunli Liu-a 2018 küm nungi US nung lar chir asem den külemi alir. Tena chirmur asemprong America sensotem lir. Video ajanga interview ka nung jembidang pastor Jin kinüngtsü Liu-i, "Kü kinüngbui mapa tulu inyakba agi parnoki pa tsübur," ta ashi. Grace-i, "Tawa kübui visa renew asütsü atema Beijing nung aliba U.S. Embassy semdangtsü merang, ajisüaka ketdangsertemi pa nokdang aser airport tashi anir ao. Pa dang tangsa linük yimtiba toktsür oang ta ashi," ta metetdaksü. China nung ketdangsertemi pastor Jin apuba sülen tang tashi par kibong züngsemtemi pa den tongtepratep mesüteter. US nung aliba Zion Church nung lenir Pastor Sean Long-i, online ajanga Khristan yimsü dak sendakba osangtem prokba atema Jin anema ken o benoktsüa akok, ta ashi. Pastor Long-isa, Jin mapang talangka tepuokdak ayutsü atema obendang agütsütsüa akok ta Arogoi bilemer, ta metetdaksü. Grace Jin-i, "Ozü kibong züngsemtem den tanaben longjemtsü atema kübui lenisüba menden toktsütsü atema-a bilemdangogo," ta metetdaksü. US nung amenoka aliba ChinaAid Association tentetsang, Bob Fu-i, "Tesüiba küm 40 tashi China nung Khristantem mita oa apur aser underground Arogotem anema inyaka reshikangshia arur," ta metetdaksü. Luke Alliance tentetsang, Corey Jackson-i, talisa 2018 küm nungi tenzüka China nung tamangertem anema inyaker, aser iba tensa ya tamajungba dang akümtsüa akok, ta ashi. China linük temzüng ajanga tamangba yimsü temeden agütsür, ajisüaka Communist Party-i Tsüngrem dak mamangba tangatetba benoker aser tekülem agitsü atema sorkari agizükba religious organizations nem dang temelaba agütsür. China nung Tir, Xi Jinping yimsüsüba kübok underground Arogotem aser lenirtem anema inyakba kanga bulua kümogo.

ANOGO ABEN TSÜNGREM DEN

Parnok Tsüngremi aniba nung anidak

Parnoki parnok shisatsü nung mezüngbuba Tsüngrem tiyongtsü südaktsür Pai aniba nung anidak. Messiah atema shinba parnoki koda angazük asenoki memetet. Tsüngremi parnok Kinü Yisu dangi anitsü ta amang., asenoki aji dang metet. Anüng nung aliba temangtem metetta alibaji shisa akar yimya liasü. Parnoki tasen Chuba asoba temaitsütem anogo aika anüng nung bushir alitsü südi. Petinui anibaji parnoki Tsüngrem temeyong agi parnok aniba ama parnoki agizük. Tsüngremi aniba nai metetta lir ma? Iba ochi iba anogo nungi tanü tashi memelenshir lir. Shibai Tsüngremi aniba nung anidaker pa/la shidakba shisa taka lir. Anüdoklen nungi item tashi temetettertem nem leman atema mapa magütsü, parnok nem petinu dang ka agütsü. Parnoki tesangwaji dang anidak, aser ibaji asoshi Tsüngremi parnok dang pela. Kari ashir, "Tsüngremi mulungba talang nung lia metettsü asoshi asenok jilia talang ka orr atatsüla." Ibaji shidak masü! Tsüngremi asenok nem jili leman mesayur, saka Pai asenok mera shiaji anüker. Pai ne leman anitsü, A. Shin züluri ashir (A. Shin 3:6). Tsüngremi Israel chirtem nem anüng mepet tongshi ka aser aonung mi tongshi ka parnok anitsü asoshi agütsü. Pai shisa kartem nem petinu dang ka agütsü. Tanü Pai asenok den yamaji meinyaker, saka asenok jakdang Pa aotsü Pai nangzüka lir. Asenoki Kibuba tsütsü mera ka aotsü mulungra Pai asenok tsütsü mera ana arutsü. Tanü shirnoki Tsüngremi aniba nung anidaker parnok shisa akartem lir. Azerbaijan nung Arogo ka indang registration temepishiba magizük **October 13, 2025:** Azerbaijan meimchir temeden atema kübok Sumgait yimti nung inyaker, Murad Aliyev-i, "Tang Peace Church-i official tesüsa registration atema registration atema temepishiba agütsüba agütsü, ajisüaka sorkari Protestant Arogo pongu Protestant Arogo rongnung Peace Church densema lir. Arogo karibo küm ana dak tali telangzüba atadar," ta metetdaksü. Peace Church-i sangdong ka ajanga, "Linük temzüng kübok tekülem agitsü atema temeden agüja aliba temeden onok nem magütsür. Onok nem telangzüba tejangja magütsür aser mapang telatet makai mapang talangka atadaksüba ya onok temeden anema inyakba lir," ta metetdaksü. Aliabad yimdak aliba Baptist Arogo ka indang temepishibabo küm 25 sülen agizükogo (2020 küm agizük). Sorkari Honibar shia tekülem sentong ghonda ana agitsü temelaba agütsü. 2020 küm December ita nungi tenzüka tang tashi nung state committee-i Church of Jesus Christ of Latter-day Saints indang registration dang agizüka lir. Osang angazükba agi, Azerbaijan nung Khristantem temeden atema European Court of Human Rights (ECtHR)-i inyakdar. Azerbaijan linük temzüng ajangabo yimsü temeden agütsür, ajisüaka iba ozüng kübok State Committee for Work with Religious Organizations nungi temelaba agitsü nüngdaker. Iba ozüng kübok aibelenertem dang senchi achir mesüra tepuokdak ayur. Azerbaijan nung nütsüng shilem 96 bo Muslim nunger lir, ajisüaka iba linük indang yimsü alakteta mali. Peace Church-i official registration atema nüngdakba documents ajak anepalua taküm April ita nung sorkar nem agüja liasü, saka sorkari magizük. July ita nung State Committee senden amenba mapang nung parnoki, Peace Church nung pastor-i miimshia senden ayongzüka agir, ta tai tonglokja liasü. Osangbenertem den jembidang Attorney aser

AO OSHI ANGAZÜKDAK:**TANÜ ANGAZÜKTSÜBA OJANG****Tokbang**

(v) osettsüset agi tesem ka nembang (fill up or cover a place)

* Onoki ali bener arua lenmang nung lishi alidak tokbang.

Tokden

(v) khu nung bener arua benden (keep grain type things at a collection place)

* Alururtemi tsük ajak jentang tokden.



Tir Yimyim

OLONG PAITEP # 7299

1			2		3		4		5
6		7							
					8				
9				10					
						11			
			12						13
	14							15	
					16				
			17						
							18		
19									

TIPIEN

2. Teburtemi tejak nung awaba
6. T ___ em
8. Tzüik ayudak
9. Nüingdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den
külemi yanglusemer

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüingda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

OLONG PAITEP # 7298 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden,
3. Kioktsü, 5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER**Alima nung nütsüng yongsük teimtiba renlokba linüktem**

Country	Number of Years Forecasted for Population to Double	Population (2025)	Region
Yemen	24	41.8M	Middle East
Mauritania	25	5.3M	Africa
Mozambique	25	35.6M	Africa
Zambia	25	21.9M	Africa
Afghanistan	26	43.8M	Middle East
Chad	26	21M	Africa
Uganda	26	51.4M	Africa
Cameroon	27	29.9M	Africa
Malawi	27	22.2M	Africa
Ethiopia	28	135.5M	Africa



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela
Tasoba Anogo

**Sikkim sorkari 'Be Kind to Animals' yimyim zülutsü tuyur****Gangtok, October 13, 2025**

(Agencies): Sikkim sorkari state nung register süa aliba public transport gari ajak nung "Be Kind to Animals" yimyim sayutsü tetuyuba agütsüogo.

Transport Department nung Motor Vehicles Division ajanga iba tetuyuba agütsü. Iba ya shiruru anepalutsü aser meimtsü tangatetba ajungkettsü indang public awareness atema lir ta parnoki ashi.

Ministry of Road Transport and Highways ajanga linük ajungalen campaign inyakba den puteper aser Indian Constitution nung Article 51A(g) akangshir. Iba nung sensotemi lipoküm aser shiruru dang taochi sayutsü lateta lir.

Gari kiburtem aser operators- i iba tetuyuba tasen sülen anidaktsüla aser Transport kettangsurtemi mita reprangtsü.

Iba yimyim ya public transport

vehicle shia nung tejaklen aser tesülen jangjangja zülutsüla. Iba ya English, Hindi, mesüra regional language mashi ka nung zülutsü akok.

Sorkari iba tetuyuba ya All Sikkim Sarathi Welfare Board Chairman, Chief Minister Principal Secretary, transport officials, police superintendents, Regional Transport Officers, aser public transport associations ajak dangi yokogo.

ABSU-i Bodo Accord nung keta aliba ajak mapa akümtsü rongshir**Guwahati, October 13, 2025**

(Agencies): All Bodo Students' Union (ABSU)-i October 12, 2025 nü osangbener senden ka alidang Bodo Peace Accord ajunga mapa küma inyaksü rongshitsü metetdaksüogo.

Kokrajhar nung central office Bodofa House nung senden amendang ABSU President Dipen Boro-i "October 8 nü Rangia nung special representative senden ka amendang bangzüing aika renemogo aser iba nung January 27, 2020 nü sign asüba Bodo Accord nung keta aliba ajak mapa akümtsü dena lir" ta ashi.

"Bodo Accord nung aliba onüktem ajak mapa mekümra,

ABSU-i ozüing melaba ama lungkak aittsüsa akümtsü" ta Boro-i ashi.

Parnoki akhangba tali ulushitsü atema October ita tatemlen Assam kübok district-level nung rally tem ayonga agitsü aser November tatemlen New Delhi nung lungkak aitba sentong ka agitsü ta ABSU-i metetdaksü.

India sorkari taruba parliamentary session nung 125th Constitutional Amendment Bill agizüktsüla. Iba ya Bodo nung atema yimtenren aser rongsenketzüing kümzüka ayur ta ABSU-isa ashi.

"Assam nung kin 6 nem Scheduled Tribe (ST) jenjang

agütsüba ajanga tang aliba ST kin 14 temeten aser tajangzüktem nung mekongshitsüla. Onoki shinga anema menoktaker saka kechi lemtet agidir agiaka tang lisopur kintem dak mekongshitsüla" ta Boro-i ashi.

Karbi Anglong nung Bodo candidates atema Teacher Eligibility Test (TET) agitsüla aser iba atema Assam Education Minister Ranoo Pegu den tang tejembidak lir, ta paisa ashi.

ABSU-isa Bodo regions nung school ajak provincialisation asütsü aser Bodo Accord nung lateta aliba ama sorkar kübok aitdaksütsüla ta takhangba agütsüogo.

Indian Army-i Girl Child Day nung sanitary kits lema agütsü**Imphal, October 13, 2025**

(Agencies): International Day of the Girl Child 2025 nung Indian Army-i school tanur 300 nem sanitary kits agütsüogo.

"The Girl I Am, The Change I Lead - Girls on the Frontlines of Crisis" omen nung ajemdaker agiba sentong nung tanur tetsür nem menstrual hygiene, self-care, dignity, aser adolescent health & empowerment

angatetdaksütsü atema iba mapa inyak.

Indian Army Red Shield Division-i Kasturba Gandhi Balika Vidyalaya (KGBV), Andro, Imphal East district den külemi school campus nung iba sentong ayonga agi.

"Indian Army-i community development nung maneni yariba aser kaketshirtem timi indaksütsü asoshi mapa balala

inyakba atema pelar" ta school principal Rani Rose-i ashi.

Ibala mapa ya security dak alia lir aser iba ajanga tanur tetsürtem temulung uludaksür aser nükjidong tulu yudaksür ta lai ashi.

Iba sentong nung Maj Memthoi KH (Retd)-i career guidance, mental wellness aser health & hygiene onük jemba liasü.

Joel Mokyr, Philippe Aghion aser Peter Howitt nungeri Nobel Prize in Economics angu



Stockholm, Mongputeni/ Oct. 13 (Agencies): Economists Joel Mokyr, Philippe Aghion, aser Peter Howitt nungeri yimya tasen amshiba ajanga rongsenketzüing ainba indang research agiba mechi 2025 Nobel Prize in Economic Sciences agütsür ta Royal Swedish Academy of Science ajanga Hombarnü sangdong.

Par aseme yimya tasen amshiba ajanga rongsenketzüing indaktsüba indang inyakyim rateta shitetba ajanga iba sempet ya angur aser parnok mapa ajanga technology tsütsü terenlok aliba ajanga mapang talangka yimchiyimjung lidaktsütsü asoshi angatetba melenshi, ta Academy ajanga ashi.

"Sempet angur temi rongsenketzüing maneni ainba zübazülema magizüksü sayu," ta Academy ajanga ashi.

"Nisung meimchir puti otsü timba nung atsüdaka aliba - renlokba masü - ya yimya ka ama aru. Parnok research ajanga tanen makai terenlok aliba nung tetsükdaktsü tem jangjateta bentettsü tongtipang ta sayu."

Iba sempet dang Sveriges Riksbank Prize in Economic Sciences in Memory of Alfred Nobel ta ajar, aser iba sempet nung sen 11 million Swedish kronor (USD 1.2 million shi) lir.

Taküm asoshi Nobel sempet ibai tatembangba alitsü, aser taoba hopta medicine, physics, chemistry, literature aser peace indang

sangdonga liasü.

Shidakba Nobel Prizes ya Alfred Nobel indang 'will' ajanga 1895 küm tenzük aser economic prize ya mapang tatsüka lir 1969 küm Sweden indang central bank ajanga tenzüka liasü.

Mezüng sempet ya Norway nungi Ragnar Frisch aser Netherlands nungi Jan Tinbergen nem agütsü, shirnoki dynamic economic modeling yanglua liasü.

Economic prize ya Milton Friedman, Paul Krugman aser taoba US Federal Reserve Chair Ben Bernanke nunger nem agüja lir.

2024 küm iba sempet ya Simon Johnson, James Robinson aser Daron Acemoglu nunger nem agütsü.

Hamas-i pua bener aor takum alir ajak Israel nem agütsüogo

Jerusalem, Mongputeni/ Oct. 13 (Agencies): US tetsüngtai ia ceasefire yangluba kübok Hamas-i Israel nunger pua bener aoba takum alir tanüingba 20 chiokogo, koba küm ana raraba ajanga Gaza kanga sashia raksatsür aliba tatem kati arutsü asoshi tongtipang mera ka lir aser US Tir Donald Trump-i 'Middle East nung otsüsütsü anogo tasen adokogo' ta sangdong.

Takum aliba hostages tejangja ajunga Gaza nungi Red Cross ajanga bener arutsüogo ta Israel mitkari ashiba ajanga Tel Aviv nung "Hostage Square" nung adenshia aliba nisung meyirijang aika ola adoka pelatepa, azütepa aser jepteba liasü.

Iba tezüngzüktep nung shilem ka ama Palestine nunger tepuokdak alirtem Israel-i chiokba Gaza Strip aser Israeli-occupied West Bank tonga arudang parnok tekolak ongdoke liasü aser karbo kanga kongrar liasü.

"Anüing süngjema lir, prangbong ola madoker, sirens tem süngjema lira ser Holy Land nung anü adokba tesunep nung lir," ta Trump-i Knesset (Israel parliament) nung ashi.

Trump ya Gaza nung yimjung asoshi sentong balala yanglutsü nükjidong nung senden ka nung adentsü asoshi Egypt-i aotsü lir.

Israel nungi pua bener aortem aser Palestine nunger tepuokdak alirtem chiokba ya Gaza accord mezüing phase nung tongtipang mera ka liasü, koba Egypt tzükumlen Sharm

el-Sheikh nung taoba hopta renem.

October 7, 2023 nü Hamas-i arütsü alema aita Israel amakdang nisung 1,200 tepseter ano nisung 251 pua bener aoba sülen küm ana lir Trump-i yimjung asoshi points 20 blueprint agütsüba nung mera agitsü asoshi linük 20 dak nungi tema lenirtem adenshütsü.

Israel-i tayimtsü amshia amakba, bomb pokloktsüba aser alilen nungi amakba ajanga Gaza ajasatsür Palestine nunger 67,000 dak tema tepsetogo aser iba tesem ya timba aoyi kumsür lir.

Egypt, Qatar aser Turkey den külemi Trump administration tetsüngtai ia iba yimjung ken o ya jembia aser phase tanabubai Trump-i anir "Board of Peace" ta sür international body ka tentettsü ajungshir.

Ajisüaka ano mashi lenmangi aotsüa akok, kechiaser taoba mapang rara anendaktsütsü merangba nunga memulungtepi anenadok. Yangji rara tembanger Gaza Strip koma yimsü asütsü aser Hamas tia koba nung tembangtsü ta asübatem dena lir.

Hombarnü Hamas telok nungi sepaitem dena Nasser Hospital nung adenshiba ajanga iba Islamist telungpur teloki maneni Gaza nung yimsü asütsü akok ta Israel-i tebilemstü akaba ataloktsü ama ajiteter.

Ceasefire kübok Israel sepaitem ainshiba sülen Gaza City nung Hamas sepaitemi "gang" ka nungi züingsem 32 tepset ta ashir.

Zelenskyy-i Russia military anema Tomahawks dang amshitsü nangzük

Kyiv, Mongputeni/October 13 (Agencies): Ukraine Tir Volodymyr Zelenskyy-i, parnoki Russia nunger military target tem anema long-range Tomahawk missile tem dang amshitsü, ta shiogo. Washington-i Kyiv nem prangbong injang tapu balala agütsütsü sentong alitsü akok ta bilema Kremlin-i tebilemstü lemsatepba mapang Zelenskyy-i iba olen ya lemsatepogo.

Zelenskyy-i jembiba o ya United States nung Deobarnü Fox News nung sayuogo aser kasa anogo pai US tir Donald Trump den sensaksema liasü.

X ajanga Ukraine tir yagi pai Trump den kanga takok ngua sensaksemogo, ta ashi. Paisa, tenati par linük air defence tashi akangshitsü aser long-range missile tem indang sensaksemogo, ta ashi. Tang agi tanabenbuba nung lenir ana ya sensaksemogo.

Hombarnü Trump-i ashiba agi, Tomahawks amshitsü sentong jangjaba sülenang pai Ukraine nem iba ya agütsütsü ta shiogo. Paisa, iba ken o dak sendakba nung pai telemtetba ka agiatokogo, ta ashi.

Tomahawks indang range ya



Ukraine Tir Volodymyr Zelenskyy aser US tir Donald Trump sensaksemba mapang.

2,500km (1,550 miles) lir, anungji Ukraine-i iba missile ya Russia nung arrtsü nungi pilar tesem balala amaktsü asoshi amshitettsü.

Deobarnü Israel-i aoba mapang o jembidang Trump-i, Tomahawks indang jembioogo aser ashiba agi, rara takaratiba nung metembangdaktsüra pai Ukraine nem iba missile ya agütsütsü ta Russia tir Vladimir Putin dang ashitsü akok.

"Parnoki Tomahawks aginer," ta Trump-i ashi.

"Tomahawk ya hadir tajung aser kanga tesashi lir. Iba ya Russia-i menüngdaker," ta Trump-i shisem.

Deobarnü Kremlin otongdar Dmitry Peskov-i iba onük ya

Russia asoshi kanga dang süoki ia agitsüba onük ka lir, ta shiogo.

"Lenla ajak nung tang tensa tamajungba küma odar," ta Russian state television reporter Pavel Zarubin-i ashi.

Missile ya tapu karibo nuclear warheads dena bentettsü ta Russia-i temulungdang ayutsüla, ta Peskov-i ashi.

Russia-i tawa Ukraine indang energy infrastructure tem amakba atema France tir Emmanuel Macron-i parnoki aitsüba sülen Kremlin otongdar yagi iba olen ya lemsatepogo.

Deobarnü Zelenskyy den sensak asema sülen Macron-i ashiba agi, "Gaza nung tenangzüktepba ka yangluba

sülen Middle East nung yimjung adoktsü timla aliba mapang Ukraine nung rara ya-a anentsüla."

"Russia-i maneni raratsü dang bilema, sensaksemtsü atema memulungra parnok akoksatsü," ta pai ashi.

Zelenskyy-i Facebook post ka ajanga ashiba agi, pai Macron dang Ukraine nem missile aser defence system tem talila agütsütsü mepeshia asüngdangogo. Paisa, alima tangalen rangloker aliba mapang Russia-i Ukraine tali makdar, ta ashi.

"Middle East aser linük ajak nung domestic ken o tem dak tali rangloker aliba mapang Russia-i iba maongka ya agia

arudar," ta Zelenskyy-i Macron den sensaksemba mapang ashi.

Taoba mapang ama asüakwa atongtsü lia Russia-i Ukraine indang energy infrastructure tem raksatsütsü atema merangdar.

Taoba hopta kija nunga Russia-i Ukraine dak drone 3,100, missile 92 aser glide bomb 1,360 shi khaloktsüogo, ta Zelenskyy-i ashi.

Deobarnü Russia-i Kyiv temeket amakba mapang Ukraine indang private energy company tulutiba DTEK nung inyaker ana yirua liasü, ta regional governor-i sangdong ka ajanga metetdaktsü.

Hokolbarnü Ukraine Ato Kilonser Yulia Svyrydenko-i ashiba agi, Russia-i rara tenzüker tang Ukraine indang energy infrastructure tamajungtiba makogo aser iba ajanga linük kübok tesem aika nung power agi timtema liasü.

Russia-i 2022 küm February ita nungi Ukraine amak tenzüker linük ana tsüingda tanen makai khatapa arudar. Yimjung asoshi aiben jembishinüdar, saka takok monguteti lir aser kasa mapang nung linük ana kati ka taliba maktepdar.

NSF MM Trophy: Nagaland United FC semifinal-i iogo



Kohima, Mongputeni/October 13 (TYO): Nagaland Super League runners up Nagaland United Sporting Club -i Honibarnü NSF Martyrs Memorial Trophy nung Mao Students Union koka semifinal tongtetogo. Iba asaya ya Indira Gandhi Stadium Kohima nung asaya liasü.

Honibarnü asaya nung

Nagaland United-i goal 2-1 agi Manipur nungi adokba Mao Students Union koka liasü.

Asaya nung Nagaland United atema goal ana ya Sanathoi Meitei-i minute 22 aser 67buba nung idakja liasü.

Kasa mapang nung Mao Students Union atema goal ka ya Ngararsuing-i minute 72buba nung idaktsü, saka parnoki tanabuba goal

magütsüteri asaya makok.

Tasembuba quarter final nung match patron ji Special officer to Chief Minister Nagaland Neibalie Rio liasü, aser pai player of the match naroküm Sanathoi Metei nem agütsü.

October 14 nü 4buba quarter final asaya @4:30 pm:

Nagaland police vs

Anal Lenruwl Tangpi.

Jack Wilshere Luton Town head coach kümogo



Mongputeni/October 13, 2025 (Agencies): English club Luton Town Football Club-i, Jack Wilshere parnok indang first-team head coach asütsü shimba Hombarnü metetdaksüogo.

Arishi küm 33 tain coach shiba Arsenal nung maden tsüngda club indang youth program nung inyaka liasü pa Norwich City nunga mapang tatsüka inyakogo.

"Luton Town manager asütsü shimba ya tetushi aser maongka ka lir," ta Jack-i ashi.

"Ni Luton-i arishi küm ti asüdag aru anungji ni club ka nung mezügbuba manager mapa-a idaki inyaktsüsa akümba ya tia asütsü ta ashitsü akok," ta pai ashi.

"Ni kanga pelar aser iba club achaayangtsü asoshi matateter. "Club otsü agi ni ajungmesor, koba tamang, telongjem aser meranga inyakba dak amendaker yangerba lir," ta Wilshere-i shisem.

"Club-i tawa ground telung aser tema nung yimya tajung sayuogo aser iba telok ya anir aotsü atema khuret agizükba asoshi pela bilemer.

"Season nung ano asaya aika asayatsü anunga lir aser ni mapa inyak tenzüka

inyakyim balala nung kü indang stamp enokja iba club takok dangi anitsü yongya atar," ta taoba mapang Arsenal asayar yagi ashi.

"Ni Luton fan tem nem

parnok nema adangtsüsa club ka agütsüner aser iba atema mapa tanü tenzüker," ta taoba mapang England nung asayar yagi ashi.

"Jack tejangraba, shisatsü aser iba asayar modern approach ya Luton Town nükjidong den kanga peter. Temaba jenjang nung pa tajangshibatam aser sempet aketba asayartem anitettsü atema bendanga agütsür aliba ya onok atema taruba tapak asoshi kanga tetemsü lir," ta club CEO Gary Sweet-i ashi.

"Pai football asaya atema pa tejangraba, coach ka ama takok ngua inyaktsü atema pa temulungtetba aser pai Luton Town tia jenjang kanga junga jangja aliba ajanga ajak atsüa arua liasü," ta paisa shisem.

Satwik-Chirag nati anir India nunger asayartem Denmark Open asayatsü



Mongputeni/October 13, 2025 (Agencies): India nunger nungtu tebur tarep asayar Satwiksairaj Rankireddy aser Chirag Shetty nati anir India nunger asayartem Mongolbarnü nungi tenzüka USD 950,000 Denmark Open Super 750 badminton asayamung asayatsü. Tena taküm mezügbuba asayamung akoktsü atema kanga meranga asayadar.

Seeded sixth, Satwik-Chirag na mezügbuba round nung Scotland nunger Christopher

aser Matthew Grimley na den asayatsü.

Taküm India nunger asayartem rongnungi Satwik aser Chirag nati tajungba asaya arudar. Tenati Hong Kong aser China Masters Super 750 tournament tem nung final tonga asayaogo. Tenatisa Paris nung World Championships asayaba mapang tanabuba bronze medal nguogo aser ano asayamung ka nung semifinal tonga asaya liasü.

Tebur kija asaya nung world No. 28 Ayush Shetty, shibai

Latvia den asaya nung Watkins masayatetsü

Mongputeni/October 13, 2025 (Agencies): England striker Ollie Watkins yiruba sülen, Mongolbarnü Latvia den World Cup qualifier asayatsü aliba nung masayatetsü.

Arishi küm 29 tain asayar ya Brehostibarnü Wales goal 3-0 agi akokba asaya nung half-time sülen melena liasü.

Wembley nung iba asaya nung Watkins-i par team atema tanabuba goal idaktsü, saka asaya mezügbuba shilem atemtsü lia goal idaktsütsü maongka anguba ka magiteti pa post nung oa tsüka liasü.

Asaya tembangba sülen England coach Thomas Tuchel-i, Aston Villa forward ya junga dang lir ta ashi, saka pa Villa-i meyipaogo aser Riga nung oa asayatsü aliba asaya nung masayatetsü.

Mongolbarnü Latvia den asaya ya kokra Three Lions pur qualifier nung asaya ana asayatsü anunga lia taruba küm World Cup atema qualify süatoktsü.

Captain Harry Kane, Wales den asaya nung masayatet saka Tuchel-i asaya metenzük tsüngda ashiba agi, Bayern Munich striker ya Riga nung asayatsü aliba asaya nungbo asayatetsü.

Arishi küm 32 tain asayar ya Hombarnü Tottenham indang training ground nung England team-mate tem den training agiogo.

Wembley nung Wales den asayaba mapang asaya tanabuba shilem nung Watkins' melena Newcastle winger Anthony Gordon teyong nung



asaya aser Riga nunga pa kasa position nung asayatsü imlar.

Asayartem rongnung ano Marcus Rashford-a shimtsü akok. Manchester United forward ya tang Barcelona nung loan nung oa asayadar aser pai tabelen nungiang asayaner saka pa taoba mapanga teyong nungi asayadaksüogo.

Pai England tenüng nungi asayaba mapang goal 18 idaktsür lir, koba tang squad nung Kane sülen goal timtiba idaktsürtem rongnung tanbuba asütsü.

Watkins ya England team nungi mezügbuba 2021 küm asaya aser pai asaya 20 nung goal trok idaktsür lir.

Pa tang asaya aliba season nung club nungi junga masayateti arudar, aser pai asaya 10 nung goal ka dang idaktsür lir. International break sülen Villa pur mezügbuba asaya October 19 nü Tottenham nung oa asayatsü.

taküm küm tetenzüklen US Open nung mezügbuba BWF Super 300 title ka benogo, pa France nunger asayar Toma Junior Popov den asayatsü.

Ayush-i, Hong Kong Super 500 quarterfinals tonga asayaogo, saka Korea aser China Open nungbo pai junga masayatet aser Arctic Open nung Olympic silver medallist Kunlavut Vitidsarn a mekoki liasü.

Tebur kija asaya nungsa Lakshya Sen, Ireland nunger asayar Nhat Nguyen den asayatsü. Pa taoba ita Hong Kong Super 500 nungbo final tonga asayaogo.

Tetsür kija asaya nung Anmol Kharb, shibai la indang career nung taoba hopta mezügbuba Arctic Open semifinal tonga asaya liasü, la

Indonesia tsür seventh seed Putri Kusuma Wardani den asayatsü.

Tebur tarep asaya nung Pruthvi Krishnamurthy Roy aser Sai Pratheek K na Chinese Taipei nunger asayar Liu Kuang Heng aser Yang Po Han na den asayatsü.

Tetsür tarep asayartem rongnung Rutaparna aser Swetaparna Panda na Scotland tsür Julie MacPherson aser Ciara Torrance na den asayatsü aser Kavipriya Selvam o Simran Singhi na Bulgaria tsür Gabriela aser Stefani Stoeva na den asayatsü.

Tarep temeyoktep asaya nung Mohit aser Lakshita Jaglan, Rohan Kapoor aser Ruthvika Shivani, Dhruv Kapila aser Tanisha Crasto nungera asayatsü renema lir.

BILEMDANGANG

"Raraji shibai tatok agütsür pai tembangtsür."